

Philleilmoq

Gevq-a nail gaq

Haoqgavq niil keiv iqmoeq ilmoeq bhai Gaqkhoel Paolluv aivq-i mail gevq-a nail ngaol dai, gevq-ai thaq nail ngaol. Al ovqtavq, milnee uqnee khe Khali yaq juq jemao iqsanl, Paolluv-i mail gevq-a nail ngaol dai, noeq nail ngaol.

Gevq-a nail aqyanq khi mail aqduq

Gevq-a nail aqyanq neq, A.D. 60 kovq niidai bhai gevq-a nail ngaol. Gevq-a nail aqduq neq, Lolmav meenq bhai ngaol. Paolluv Lolmav meenq nail thaonq bhai iqmoeq ilmoeq bhi nieivq bhoel-u phao, gevq-a nail ngaol. Philleilmoq haoqgavq iqsanl, thaonq bhai aol khi gevq-a nail haoqgavq al juq nail lavqkhoel bhai aol nail ngaol. Gaollaolsail nail haoqgavq bhi oil ha lai-u phao, Philleilmoq nail haoqgavq iqsanl bhi oil laivq-a nail ngaol.

Khaq sil gaq bhai gevq bhiq-a nail

Haoqgavq niil keiv neq, Philleilmoq bhai gevq bhiq-a nail ngaol. Philleilmoq neq, Gaollaolsail meenq bhai jaol khi yaqkav tsu-ai thaq nail hulmeeq hulbhao teevq gaq ngaol. Gaollaolsail meenq bhai jaol nail Khali yaq juq aivq nail ilkhaol bhai geeqlaoq hal lai nail ngaol. Philleilmoq neq, aivq nail yaqkav jiovq Aolneiqsiqmul dai mil nail teevq gaq jaol nail ngaol. Aolneiqsiqmul dai ge nail daoqceevq neq, Ganl tsoiq nail dai, ge movq nail ngaol. Teevq n aivq ni

laiq khi Lolmav meenq bhai tsaol-aivq-a nail ngaol. Aolneiqsiqmul Lolmav meenq bhai jaol thailthaiq-u phao, Paolluv bhai moel khi Khali yaq pevq lal-a nail ngaol.

Khul bhai noeqthunq khi gevq-a nail

Paolluv Philleilmoq bhai tsaq peil-aivq-a nail Aolneiqsiqmul bhai oeqbal phaiq bhiq khi teevq pov gaoq hav bhoel bhiq yaoq dai, hal nail haoqgavq ngaol.

Iqmoeq ilmoeq khe daoq

¹ Ngal neq, Yeiqsul Khali nail haqbhoil thaonq bhai aol thailthaiq nail Paolluv ngaol. Jaqbheq Tilmolseiq nv-nvq gaq nee mail ganl teevq gaq khe-ai nl nail nv-nvq gaq mailma-ail gaiq-a nail Philleilmoq bhai haoqgavq niil keiv gevq bhoel-ai lavq-a nail ngaol. ² Al ovqtavq, nv-nvq gaq nail dulma Aqbhil khi mail, nv-nvq gaq nee mail teevq gaq khe-ai, Yeiqsul nail haqbhoil genl dev yaq pevq nail, Aqgilpuv bhai maqkhaiq, naoq nail ilkhaol bhai jil lal thailthaiq nail Khali yaq munl juq bhai maqkhaiq, haoqgavq niil gevq bhoel-ai lavq-a nail ngaol. ³ Ngadao nail Aqbhu Miqyail khi mail Heeqphaq Yeiqsul Khali nail geeqlaoq eeljaol khi mail neesal-ovq nail phaqaq nuljuq nail kovtavq bhai jiaq dei-eiq.

Philleilmoq Khali bhai neema thaqtsaol khi yu bhai gaiq-a nail ganl

⁴⁻⁵ Ngaq nail jaqbheq Philleilmoq-ol. Naol neq, Heeqphaq Yeiqsul bhai neema thaqtsaol nail nee ovqtavq, Miqyail nail tsaol-aq iqsanl

bhai gaiq-a nail ngaol dai, ngal ya gaiq-a nail ngaol. Alheel ngel-i mail, ngal khaq mao iqsanl geeqlaoq hal-u phao, naoq bhai noeq kev khi, Miqyail bhai tsiqeeq nail ngaol. ⁶ Naol khi mail nvjuq nail gaiqlaq bhai neema thaqtsaol nail lavqkhoel aqtsaoq tsaq tavq nail niil neq, Khali nail lavqkhoel nee ya-a nail geeqlaoq yaoq pha q yaoq-ao nee bhai ngadao juq heeq nia jaiq lal nail haqbhoil, ngal geeqlaoq hal nail ngaol. ⁷ Jaqbheq Philleilmoq-ol. Naol goil nail gaiq-a nia nail bhaqda nee, ngal lavqkhiq tsail deede kxi, neema lavqkhoel bhai gaq gaoq aol jaiq lal-ail nial. Khul khi mail dai ngal neq, naol bhaqda nee, Miqyail nail tsaol-aq juq bhai neema aqsal bhi sal lal nail ngaol.

Paolluv Aolneiqsiqmul nail haqbhoil hal-a nail ganl

⁸ Alheel ngel-i mail, naol nl heeq pha q-ail tsaq nail juq nl yaoq dai, ngal naoq bhai Khali nail lavqkhoel nee geesil nail neema maq aol dai, daoq bivq kivq nail ngaol. ⁹ Thailhai ngaol-aq, ngal naoq bhai gaiq-a nail ngel-i mail, daoq maq bivq dai goil nail gaiq-a nail lavqkhoel nee, hal nail ngaol. Ngal neq, joiqmaoq maq lee-aq nail Paolluv pevq nail nee ovqtavq, Yeiqsul Khali nail haqbhoil niil aq-il thaonq bhai aol thailthaiq nail teevq gaq pevq nail ngaol. ¹⁰ Ngal thaonq bhai aol-u phao, Yeiqsul nail lavqkhoel ngaq nail yaqyov pevq lal-a nail Aolneiqsiqmul* nail haqbhoil naoq bhai hal nail ngaol. ¹¹ Aivq

* **1:10** 1.10 Aolneiqsiqmul dai ge nail neq, ganl tsoiq nail dai, ge movq nail ngaol.

neq, jel lal-u phao, naoq nail haqbhoil ganl maq tsoiq-ail. Thailhai ngaol-aoq, niil aq-il neq, naoq nail haqbhoil maqkhaiq, ngaq nail haqbhoil maqkhaiq, ganl tsoiq nail tsaol-aq pevq lal-a nail ngaol.

¹² Niil aq-il, ngal aivq bhai naol jaol nail bha bhi kovq lee naol. Ngal alhai bhi kovq lee-u phao, ngaq nail neema iqsanl aivq nee mail tsaothe jaol-nvq thaq nail khe-ai, dul nail ngaol.

¹³ Lavqkhiq tsail nail geeqlaoq daoq bhaqda nee, ngal thaonq bhai aol thailthaiq nail gaiqlaq, aivq naoq nail jiqdan jiovq khi, ngaq nail haqbhoil ganl nl nia dai, ngaq-ai nee mail bhi jaol movq-ail nial. ¹⁴ Thailhai ngaol-aoq, naol aqkhaoqanq maq bivq lavq-u kev dai, ngal aivq bhai maq bhi jaol lee movq-ail. Khul khi mail dai ngal-aq, naol aqmeeq pha q nl lavq-u phao, naol nl movq nail ngel-i mail nl nail pha q pevq nail bhai ngal oil movq-ail nial. Maq nl mail khul maq khi kivq nail bhaqda nee nl nail pha q maq bhi pevq movq-ail. ¹⁵ Aolnei qsi qmul naoq-ai nee mail khaq mao iqsanl ya jaol nail haqbhoil, aivq naoq-ai nee mail teevq yanq ya pav-ai tha q nail jaol-aq. ¹⁶ Alheel ngel-i mail, niil aq-il aivq kovq lee haq neq, yaqkav maq ngel yaoq-aol. Gaiq-a nail jaqbheq pevq lal-aoq nail ngaol. Ngal aivq bhai gaiq-a deede naol. Aivq neq, tsaol-aq yaq pevq nail nee ovqtavq, Yeiqsul nail lavqkhoel bhai aqivq jaqbheq iqsanl pevq lal-a nail ngel-i mail, naol iqsanl ngaq-ai nee maqtsil aivq bhai gaiq-a nail tsaq nail ngaol.

¹⁷ Alheel ngel-i mail, naol ngaq bhai naoq nail ganl nl tsaq ngaol dai, saol-nvq-ai tha q nail

ngel haq neq, ngaq bhai hav lavq-a nail khe-ai aivq bhai iqsanl hav bhiq yaoq. ¹⁸ Aivq naoq bhai teevq pha q ganav nl lai q-ai tha q nail maqkhaiq, gailjiov bavq nail pha q maqkhaiq, iqsanl mail ngaq nail kovtavq bhai bhi jia v dei-eiq. ¹⁹ Ngal neq, Paolluv ngaol. Gailjiov al ngal kha oq bhiq naol dai, ngaq nail aqlavq nee gevq bhoel-ai leevq-a nail ngaol. Naoq nail aqmaol naol ngaq bhai kha oq kovq lavq heeq pha q-ail tsa q nail gailjiov al bhai, ngal khul teevq pha q iqsanl maq ge. ²⁰ Alheel ngel-i mail, jaqbheq-ol. Yeiqsul nail maivphaoq bhai heldaiq khi, ngaq nail haqbhoil aqmeeq pha q nl lavq yaoq. Khali nail lavqkhoel ngaq bhai neema sal lal dai, teevq pov nl lavq yaoq. ²¹ Naol ngaq nail daoq naldaiq nail ngaol dai, ngal neema tha qtsaol nail ngel-i mail, ngal naoq bhai haoqgavq niil keiv gevq bhoel-ai leevq-a nail ngaol. Ngal hal nail nee maqtsil, naol nl lavq nail ngaol dai, ngal heeq kivq nail ngaol.

²² Alhai ngaol-aoq, teevq pha q hal movq-ail nail. Ngaq nail haqbhoil jaol duq micil lav sav tha q-ai lavq yaoq. Khul khi mail dai ngal-aq, nuljuq geeqlaoq hal-a nail bha qda nee, ngal nuljuq jaol nail bha teevq pov gaoq ya kovq lee naol dai, noeqthunq nail ngaol.

Haoqnao naosaq khe daoq

²³ Yeiqsul Khali nail haqbhoil, ngaq-ai nee mail thaonq bhai aol thailthaiq nail Ilbha qphaqlal, naoq bhai noeq moel-ail nial dai, daoq cavq cavq bhoel-ai leevq-a nail ngaol. ²⁴ Ngaq-ai nee mail teevq ga q khe-ai, ganl nl thailthaiq nail Maqkul,

Aqliqdaqgul, Deiqmav khi mail Lulkavq aqyu juq iqsanl, naoq bhai noeq moel naol dai, daoq cavq cavq bhoel-ai leevq-a nail ngaol.

²⁵ Heeqphaq Yeiqsul Khali nail geeqlaoq eeljaol nuljuq iqsanl nail neema lavqkhoel bhai jiav dei-eiq.

Jalliq aqsivq Gaolkheel daoq
Akeu: Jalliq aqsivq Gaolkheel daoq New Testament
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022
aaaba9fd-8172-55cc-ad15-906f43ddb5a5